

# Churer Schnudergoofa

Ausschnitte aus dem Programm 2013

A Drittel vu dr Klass vu üüs nimmt hüt scho Ritalin  
A witara Drittel kiffit wie wild und schtoot uf Kokain  
Fascht d' Hälfti khann nid läsa und – das schenkt am meischtsa ii,  
dr füfti Drittel hät wie miar – brutal Diskalkulie.  
Doch sit am Herbscht isch üüs jetz klar, das isch jo schiiss-egal,  
ob d'hüt noch rechna, schriiba khasch, isch voll-krass nid zentral!  
Denn wenn d'vo Bruch khei Ahnig häsch – mit Zahla gar nüd gooht,  
Denn wirsch halt eifach Schtimmazeller, ds Bern im Schtänderoot.

Warum nid meh go bätta khömmend zu ihm uf da Hof,  
begriift dr Bischof Huonder nid, as raubt ihm no dr Schloof.  
Am meischtsa Lüt, wo bättend gäbs, behauptet er doch schtuur,  
grad hint'r am Chauffeur vo dr Linia 6 im Bus vo Chur!

Dr Ernscht Bromeis, dä schwimmt für Schwiz Tourismus dur da Rhi  
und khunnt nid wit, es segi z'khalt, dr Arsch gfrüüri ihm ii.  
Myswitzerland dot com schtellt jetz a Hardcore-Trinker uuf,  
wo sich vo Neuaburg bis uf Locarno abasuuft!

Als Griach bisch früanar easy gsii und hüt a Sündabock  
d'EU nimmt sii brutal in d'Zanga – und jetz no dä Schock:  
In Tütschland isch's hüt sack riskant, zum Griach go ässa gooh,  
will d'wäga Insolvenzverschleppig khasch ins Güggi khoo!

Dar Gilli Gian hät üüs verschreckt, dä gseht dänn abgfuckt uus.  
Vom Schaffa khann das jo nid khoo, das isch will dä nüd pfluust.  
Mir Taschalampa untar am Teckbett luagt dä armi Maa  
A jedi Nacht sis Buach vom Globi bi Olympia aa.

A Jüngling gsehsch uf RAI-TV, a Gsicht wie Kinderfüttla  
dar Berlusconi strahlt wie blöd, am liabschtsa würd' er plüttla.  
D'Behauptig, dä sig wider gliftet, dia hät üüs empört,  
dä strafft doch ds Gsicht, indem er ds Vacuum im Hirn erhöht!

Will d' Boarder immer „wilder“ werdend, „stoned“ vom Cannabis,  
händ dia vor REGA für a schnelli Rettig jetz a Kniff.  
Wenn hüt a Boarder voll bekiffit, im Tüüf Schnee undri khunnt,  
dänn khömmen dia nid mim Lawina-, nei, mim Drogahund

Z'amerika isch dr Obama back in the white barack.  
Er gwinnt dia Wahla klar und git am Romney uf da Sack.  
Und d'Frau vom Romney, dia isch häppy, d'Äugli lüüchta tüand,  
will s'jetz zum Glück nid in a kliiners Huus iizücha müand.  
Für Tschutta hämmar üüs bis hüt jo gar nid intressiert,  
doch wo miar ds erscht mol Bundesliga gluagt händ isch's passiert.  
Bi Bayern gega Schalke 04 riibend miar üüs d'Händ,  
s'isch eifach huara geil, wenn Tütschi anand uf d'Schnorra gend!

Dia Antiraucher-Fundamentalschta händ's doch gschaftt,  
ab nögscht Jahr isch verbotta, dass ma uf am Trottoir pafft!  
Magari töfsch no qualma, wenn du uf dr Fahrbahn bisch,  
damit a jeda Tubel tscheggt, dass Raucha tödlich isch.

Vor Sohla bis zum Hoorasatz voll Epo sig er gfahra,  
das hämmer us dr Biicht vum Länceli Armsschtrong jetz erfahra.  
Dänn isch das unter sinem Arsch, - das lüchtet üüs jetz ii -  
jo gar nid sina Sattel, nei, dr lifüllschtutza gsii.

Als Bremser ima Bob isch üsra Trachsel klasse gsii  
Und was er döta glernt hätt, setzt er hüt politisch ii.  
Sis Bobkonzept für d'Wirtschaft hüt, isch scho a bitzli knapp:  
Links a Wand und rechts a Wand und immer nu bergab.

In China händs dr Tiananmen als ganz a tolla Platz,  
In Kairo isch dr Tahrir-Platz für ds Volk a grossa Schatz.  
In Chur, pralagends, glaubsch as nit, do kriagsch bim Eid a Schock:  
A fütüplutti Bahnhofschtrooss mit so ma scheiss Molok.

Au für üüs Goofa khömmand widar härtarari Ziita.  
Khei Quoder-lis, khei Bähnli uf Brambrüasch tüands meh aabüüta.  
Damit dr Gemindroot z'Chur kann zwei, drei tuusig Fränkli schpaara,  
müand mir jetz widar in da Manor go Rolltreppa faahra.

Was ds Vreni Schneider zämmasingt, das haut di us da Schuah  
und no varreggter sind dia „Moves“, wo sie probiert drzua.  
Wennd z'Läba lang in Schnallaschua im Schnee häsch müassa sctooh,  
denn söttsch das mit am Hüftschwung uf dr Bühni gschiider looh.  
Doch sie will meh, sie träumt davo zum Singa im Duett,  
und hätt weg dänna Plään mim Hansi Hinterseer greedt.  
Will dä khei Ziiit hät, hät sie jetz a no a Geilara gnooh:  
A luuti Schtimm, a sexy Hüft, ... dr Luca Tenchio!